

湘

軍

志

湘軍志總目

湖南防守篇第一

會軍篇第二

湖北篇第三

江西篇第四

會軍後篇第五

水師篇第六

浙江篇第七

江西後篇第八

臨淮篇第九

援江西篇第十

援廣西篇第十一

援貴州篇第十二

援川陝篇第十三

平捻篇第十四

營制篇第十五

籌餉篇第十六

湖南防守篇第一

湘軍志一

自古言軍勢者多侈言形勝要害積彊弱之故然其實非也項羽繆言郴為天下上游湖南自郡縣以來曾未嘗先天下國朝移行省於長沙復漢國制控扼十六大城以苗防故鎮筴頗有精兵出征四方至其財賦全盛時才敵蘇松一大縣院司之選在直省下等咸豐初元巨寇洪秀全自全州出永郴圍省城掠舟洞庭遂連破名省天下莫能當文宗憂之詔湖南治團練善後以鄉人副巡撫湘軍始萌芽矣方圍城時官吏倉皇治軍劣愈於武昌安慶其後湘軍日彊巡撫亦日發舒體

日益尊至庭見提鎮易置兩司兵餉皆自專湘軍則南至交趾北及承德東循潮汀乃渡海開臺彎西極天山玉門大理永昌遂度烏孫水屬長江五千里擊橈聞於海自書契以來湖南兵威之盛未有過此者也無他故專滅洪寇之功耳然而洪寇之盛則亦由湖南始始合圍而縱之後起偏師追而殲之豈天數耶一二人謀力之所致也道光三十年五月庚戌廣西亂始上聞其時慶遠平樂潯州在在劫掠而名者陳亞貴廣東英德盜掠浚光戕守備走懷集湖南始戒嚴駱秉章為巡撫九月詔徵鎮算兵二千詣梧州從兩廣總督進征起李

星沅於長沙授欽差大臣專赴廣西又命秉章出境
防勦秉章奏省城居中宜鎮定且飭邊吏屯戍十二月
陳亞貴平乃討金田金田村者潯州倚郭桂平縣地前
史所稱大藤峽也其西則武宣貴縣土客民自來襍居
相讎姦民楊秀清利客豪資說令求土民女為妾又自
至土家激撓之因勸豪劫女使相攻燒眾無所歸秀清
則悉劫之以叛有眾數千惡自倡亂乃投金田合於洪
秀全自明末西夷人以數算新法詫中國因得布其祆
教愚民傳奉世代祕守婦女尤惑之秀全亦假以招誘
懼官吏訛索遂拒險屯結秀清至自言通天語秀全當

為天兄咸豐元年僭號天王出掠秀縣廣西巡撫周天爵提督向榮將萬人并前發諸軍四千餘人圍之大黃江星沅天爵不相下奏請統帥大學士塞尚阿帥二都統將四千五百人駐湖南為聲援四月 詔塞尚阿代星沅星沅薨寇自武宣潰圍東北走象州秉章奏言湖南防兵四千餘前 詔提督余萬清出境會攻力不足

命總督程裔采行邊六月寇還武宣八月潰圍大破巴清德軍東走藤北犯永安陷之余萬清母喪解官留營九月鮑起豹為提督屯江華二年二月永安寇潰圍直北趨陽朔四總兵敗死遂圍廣西省城余萬清將千

人往援屯北門三月郴盜劫餉銀殺知州胡禮箴四月
寇解廣西省城圍東北陷興安全州撤七千人追之以
和春將壬寅寇入湖南境將趣永州阻水退走道州余
萬清先還守道州城總督駐衡州聞寇遽乘舟北走萬
清亦棄城不守乙巳道州陷巡撫委事總督總督聞永
州寇退復還衡州六月庚辰朔塞尚阿移駐永州合兵
二萬餘人圍寇道州檄鮑起豹還長沙丁亥寇分陷江
華殺知縣劉興桓壬辰陷永明丁未陷嘉禾戊申陷藍
山七月己酉朔陷桂陽州知州李啓詔走死庚戌陷郴
州殺知州孫恩保詔罷駱秉章逮治余萬清以羅繞

典治軍長沙料兵唯二千餘人練勇三千餘人巡撫張亮基未至總督程喬采託衡防不來秉章繞典方議築土城禁謠言未能謀兵事也寇既陷郴疑所往己未走永興殺知縣溫德宣分黨踞之大軍悉移永興蕭朝貴者以膽謫自奮謂羣寇遲悞獨率千餘黨謀襲長沙繞山道東北行百九十里掠安仁而寅陷之北犯攸丁卯陷之遂過醴陵丙子至省城南十里止城中料寇當從耒衡正道來民走報寇至怒其無公文執將斬之石馬鋪屯將尹培立以潼關副將率陝西軍千人倉卒拒戰陝軍不慣稻食所屯地無麵皆買之城中華軍未朝食相

持一時許皆潰散培立死之於是潰軍或走城中巡撫
方巡城乃遽還塞南門然猶不知何軍潰敗城外居民
亦不知寇已至蕭朝貴設幕城南有楊生者誤以為達
官上謁獻策朝貴領之俄而寇將至怪問何人朝貴曰
此楊先生條程事者生覺蒲伏幕後踰山走而寇望城
東南隅高樓以為城樓趨之則非門返而南門塞城中
乘城分守矣寇據郭外民居不知所以攻但發礮擊城
礮凡及城中街有賣漿者方食而碎其盃城中大震或
議發城上大礮擊之或曰無礮臺必驚岫城垣不可輕
也寇至之日城中兵勇八千餘統將數百名隸巡撫巡

撫不敢言節度諸生及舉貢各自請領百人或二十人
佐巡塚口多詣羅繞典言事布政使恆福內召潘鐸代
之未至署司道周頌張其仁等莫敢與兵餉大議惟善
化知縣王葆生頗好言兵諸大吏將帥亦莫之問也鮑
起豹居城南樓迎城隍神大像與對坐張亮基已至甯
鄉界聞警還屯常德集兵八月壬午鄧紹良將楚雄兵
九百入屯南城始發礮擊外寇潘鐸至步巡城中令居
民商賈各安業無恐城中被圍七日亦稍自定 詔奪
塞尚阿程晉采官以徐廣縉并代之促向榮赴援向榮
自四月初稱疾居桂林塞尚阿深刻之罪至遣戍榮終

不起聞塞尚阿罷乃疾行癸巳至丁酉張亮基至己亥
駱秉章解任留居城中庚子柳寇悉趣長沙益募礦夫
穴城根九月丙辰塞尚阿至諸援師大集近五萬矣向
榮不樂居城中以寇渡湘亦率所部渡湘為屯時獨搏
戰不利諸軍相視莫往城南戰事主於和春屯白沙井
自以扞遏為功而江忠源以偏師與合屯或以為忠源
之謀然寇與官軍均踰伏屯內屯外一里行人來往自
如入城者唯避南門其餘六門皆可縋以出入衢巷間
婦女娛遊酒食過從盛於平時忘其為圍城焉丙子南
城地雷轟發城崩四丈鄧紹良部軍方集天妃祠攤錢

博戲紹良獨拔刀當城缺斫先登一人者顛部軍聞之
皆棄錢奔城缺寇不敢上練丁輦木石塞缺口城守復
定十月己卯地雷再發不及城垣甲午地雷發城岫八
丈瞿騰龍拒缺口寇復退走於是徐廣縉方止湘潭議
者以為合兵腹背擊寇可殲也而巡撫羣官以為塞尚
阿在城中廣縉不宜來逼之其前軍將福興寔來乙未
夜半寇渡湘西走丙申城上訶寇屯疑空虛有呼者曰
賊去矣將帥聞報皆愕且懼無敢言賀而僚吏士民相
慶論功不復問寇所往張亮基奏請防湘潭徐廣縉以
為寇走甯鄉遣兵南防湘鄉故寇收罷衆從容以去或

曰和春軍士賣縱之或曰非也寇不畏官軍安有賄之
戊戌寇破益陽掠船出資口十一月己酉破岳州岳州
之防以土人領漁船五百柵土星港遏諸商賈民船萬
數寇至漁船散走悉掠兩岸人船寇勢自此盛矣諸將
唯向榮遣兵尾追陣亡副將紀冠軍湖北提督博勒恭
武道員王東槐將八百人防岳州寇至與府縣官俱走
文宗悔用徐廣縉嚴詔切責廣縉知事必敗遂益逗
留與人書自言屏息以待雷霆湖北巡撫常大瀛奏留
江南提督雙福助守悉斂兵入城寇以故水陸長驅十
二月己卯湖北省城陷辛丑逮治徐廣縉以張亮基署

總督潘鐸署巡撫羅繞典以雲貴總督防荆襄曾國藩以在籍侍郎幫辦團練丁亥遣江忠源討瀏陽土寇方省城之被圍也瀏陽廩生王應麟得周國虞通寇書國虞懼殺應麟言官發其事事下巡撫張亮基猶豫未敢發周國虞者忠義堂盜魁也忠義堂自承平時有之劫掠私鬥陰署徒黨歷年不能治亮基畏其衆初作奏以為不足煩兵已而跂足臥且思躍起曰決矣乃遣忠源忠源初至國虞以為兵少易與遽襲其營官軍出衆駭退遂逼其巢下令良民投營領牌者貸死其夜解散數千國虞走江西斬其黨衆十餘人湖南討土寇自此起

三年正月丁未寇棄武昌東下壬戌陷安慶張亮基至湖北治軍奏以江忠源自隨是時曾國藩始至省城議練軍城中守兵四千將領多者統五百人少或百人以游擊色欽額總營務練勇成軍者有南勇瀏勇楚勇寶勇湘勇率以文員領之而同知王葆生官最大餘悉用生監新田張榮組以知州在籍頗被擢用有事輒令將以往道員張其仁為總巡而夏廷樾裕麟為委員號幹練得與謀議二月寇連陷江甯揚州益趨東北潘鐸奏撤兵二千餘人留沅州兵千七百防省四月鐸病免駱秉章自湖北移撫湖南江西上猶土寇犯桂東廣東陽

山土寇犯宜章臨武永興土寇起掠安仁並遣夏廷樾率張榮組往討之軍至寇解散國藩奏重懲內姦因以便宜捕斬姦民胥隸甚眾以劉長佑王珍將練勇州縣上言積盜拒捕者輒以兵往衡山新田劫盜起皆討禽之又令在城官兵月六會操以署參將塔齊布訓練勤特奏遷一階令兼領練軍五月廣西興安恭城寇起犯永明江華藍山臨武零陵永桂官兵拒討之酃縣衡山姦民復相扇動張榮組羅澤南往捕之江甯寇分黨掠江西圍省城別遣寇黨浙江陷安慶江忠源自湖北率所部軍入南昌助守請援於湖南東章國藩以楚勇最

有名檄寶慶知府魁聯募二千人益以湘勇千人鎮算
辰沅兵六百人遣夏廷樾朱孫詒名統之而羅澤南實
主其軍純用其弟子領營哨別用忠源弟忠淑率楚勇
先進期會於瑞州忠淑軍於道潰散廷樾等至南昌一
戰不利諸生死者七人收眾入城忠源以新軍不可用
令往吉安擊土寇七月廣東樂昌寇犯興甯王珍拒走
之八月南昌圍解援軍還江西太和寇陷茶陵王葆生
塔齊布王珍合討之寇進陷安仁殺訓導吳崇尋退走
鮑起豹以南昌圍故入城治防惡塔齊布之為曾國藩
用也長沙協清德因而間之縱提標兵圍國藩行轅國

藩走免遂移駐衡州語在曾軍篇九月湖北防江軍潰
於田鎮張亮基免吳文鎔為總督廣東英德寇犯宜章
周鳳山儲玟躬拒走之十月常甯土寇闌入治城殺典
史吳世昌把總許得祿遂走嘉禾殺把總邵定太圍攻
藍山團總孫紀良鍾良欽等拒戰死儲玟躬張榮組破
走之十二月江忠源死於廬州始議大集兵援湖北
四年正月乙卯總督吳文鎔敗死黃州以台涌為總督
寇自武昌犯岳州巴陵知縣朱元燮死之二月乙亥寇
陷湘陰西從陸道犯甯鄉曾國藩自衡州率水陸大軍
浮湘東下聞寇至遣儲玟躬往援甯鄉壬午甯鄉陷玟

躬聞警馳赴之眾議以寇盛宜止屯玟躬曰賊不取正道而旁出必人少也自吾領軍皆擊土賊今遇大賊不進何以率眾及至寇方縱掠玟躬軍見寇少遂驅之寇驚走出遇掠者還相擠玟躬軍屯城外獨率十餘人卒與寇遇戰死南門羣寇傳相告官軍當來即夜引去湘陰岳州寇聞官軍大至亦俱北還駱秉章遣朱孫詒王珍率三千人出通城攻蒲圻聞寇復至收眾保岳州三月丁未寇大上圍岳州國藩軍亦至屯南津戌申岳州軍潰退寇從而上軍還省城寇踞靖港再陷甯鄉敗湘軍三營甲子陷湘潭省城上下皆寇屯巡撫提督委戰

事於曾軍四月庚午國藩自攻靖港寇不利布政使徐有壬按察使陶恩培會詳巡撫請奏劾侍郎曾國藩且先罷遣其軍巡撫不可城中亦不復設備辛未塔齊布大破寇於湘潭丙子湘潭靖港寇俱退走踞岳州巡撫提督上功而曾國藩請罪有詔詰責提督鮑起豹以專閫大員不聞出戰惟會銜奏報即日免官以塔齊布署提督塔齊布以都司署守備僅二年超擢大帥新從湘潭立功歸受印之日文武民士聚觀相歎詫雖起豹謙從亦驚喜以為皇上知人能任使軍氣始振焉是時依故事提督列銜在巡撫前曾國藩以事降黜銜名

又在巡撫後而塔齊布謹事國藩自比於列將徐有壬等皆詣國藩賀且謝罪 詔令國藩擇司道太員隨營主餉有壬等惴惴恐在選中國藩笑謝之謂所親曰此輩怯懦徒敗吾事雖請同行吾固當止之況不欲乎乃修船選士合謀渡湖五月岳州寇陷常德分陷龍陽澧州援軍將周鳳山胡林翼李輔朝等自龍陽退保益陽水軍方艤船不能救常德知府景星副將富勒敦同知李春暄武陵知縣朱元增死之寇留屯十五日六月戊辰朔棄城北走時武昌圍久湖北巡撫青麇以請援就餉為名南走長沙已巳武昌陷湖南間飢民避寇從青

麀來者萬數人心皇怖秉章運米往迎之則潰兵數百
飢悴無人色青麀至長沙留數日西保荊州詔斬以
徇台涌免楊需為總督庚辰提督塔齊布從曾國藩出
師進攻岳州署寶慶知府魁聯以習兵事特補岳州
知府與胡林翼各將兵勇繼進署提督多頤還屯常德
遣江忠淑趙盾玉等自平江出攻通城七月乙卯塔齊
布大破寇於岳州禽寇將曾天養梟之目三日猶視武
昌羣寇聞之為齋醮三日閏月戊辰朔克岳州甲戌江
忠淑等收通城廣西土寇侵郴桂永州邊以王珍周雲
耀防江華王葆生李輔朝防郴桂恭城寇犯全州增遣

陳立紀江忠濟防零陵東安八月己未曾國藩水陸軍克武昌漢陽湘軍自此名顯連州寇犯臨武參將趙永年拒走之仁化寇犯桂陽乳源寇犯宜章灌陽寇犯道州江華甯遠嘉禾王珍周雲耀及游擊駱元泰等先後合擊寇散走出境十一月駱秉章奏劾署提督多順庸劣湛酒罷之自此軍事奏報專於巡撫

五年正月總督楊需黃州師潰曾國藩分水軍還援武昌餉道阻絕水陸軍將胡林翼李孟羣彭玉麟等皆仰資湖南大發船礮火藥銀錢拯之仁化寇陷桂陽趙盾王拒戰寇棄城還遯富川寇屯聚縣城王珍周雲耀出

境攻討不利二月庚戌王葆生等攻廣東連州寇破之
收其城湖北省城復陷三月富川寇入犯永明王珍等
自江華馳擊破之貴州寇起鎮遠沅晃戒嚴是時諸軍
專備廣東邊廣西防以委永州知府黃文琛岳州防以
委魁聯辰沅防以委永順知府瞿誥惟以不請兵餉者
為能事魁聯慙直好爭議秉章弗善也會 詔補魁聯
按察使不令還省受印魁聯自以奉 特簡徑還省城
秉章因劾以委軍仍降知府幕客左宗棠雅善衡永道
文格文格時擢廣西按察不欲往因奏以文格署按察
使瞿誥權辰沅道但張戰功且募資助軍不以煩院司

故尤重翟誥奏補實授論薦甚力長沙知府倉景恬以失察盜鑄為巡撫所持奉令最謹巡撫專聽左宗棠宗棠以此權重司道州縣承風如不及矣守令能者朱孫詒知寶慶陸傳應知衡州及東安賴史直湘潭孫坦澧州胡鏞湘鄉唐逢辰邵陽邵綬名雖清濁有別皆敢於為政省城大政則鹽道裕麟委員王加敏得與操縱之柄自餘司道拱手而已於後論軍政吏治者推湖南而謫議亦自此起四月總督楊需免以官文為總督趙盾王出境攻樂昌至平石南遇寇敗死寇犯宜章王葆生軍潰富川寇犯零陵陷東安執知縣賴史直五月宜章

寇掠臨武嘉禾增黨襲郴州陷據之王葆生等軍保永興衡陽土寇起文格遣軍合湘鄉團丁捕討寇黨破散六月通城寇入岳州邊殺臨湘知縣姚榮卿湘陰長樂團丁出新牆遏之寇退通城郴寇分陷桂陽州州民結團自衛湖南民團平江湘陰桂陽州列縣無與為比魁聯既罷以知府張永實領其軍丞實辭復効免之悉以軍隸江忠濟七月攻寇蒲圻之羊樓敗退岳州以劉長佑募千人助王珍攻東安東安陷寇已三月王珍初以八百人至寇空城出走珍屯城北江忠淑屯其東軍中無故自驚寇更還攻圍珍營戰不利俱東退四十里屯

井頭墟寇復入城踞守長佑至與珍合進八月辛卯朔
寇分走新甯全州長佑援新甯珍追餘寇寇復東北走
祁陽于道破散癸巳榔寇分掠興甯安仁過癸卯陷永
興甲辰陷茶陵永興寇分黨劫掠官軍悉屯茶陵省城
戒嚴九月羅澤南自江西還軍援武昌江忠濟出軍會
之收通城茶陵寇走江西永新分掠酃縣王葆生等收
茶陵王珍攻桂陽州陳士杰率團丁助之收州城移軍
攻郴十月灌陽寇犯永明周雲耀入城城守十一月癸
亥城陷雲耀自刎死甲子桂陽餘寇犯甯遠趙永年拒
之下灌墟力戰死之永年雲耀皆起行伍領營兵號有

智略至是俱死營將中無復知名者始專用練勇矣乙酉郴寇西走永明王珍劉長佑等分軍追破之珍收永明寇陷江華長佑還師衡州十二月壬辰貴州苗寇陷冕州圍沅州遂陷麻陽官軍躡之俱退走

六年正月戊辰江華寇棄城走王珍要擊破之茶陵寇陷吉安江西列城盡為寇踞曾國藩居南昌軍報阻絕詔湖南出軍援應以劉長佑蕭啟江出醴陵劉陽己亥克萍鄉四月江忠濟攻寇通城遇伏軍潰忠濟敗死湖北巡撫胡林翼遣軍援江西道崇陽聞敗進屯蒲圻要寇破之軍進至瑞州寇復入掠平江湘陰前隊及長

沙北界掠醴陵攸縣茶陵走江西遣王珍屯岳州丙子
援江西軍克萬載九月辰沅軍出境援銅仁十月丁酉
王珍軍出境收通城乙亥援江西軍克分宜十一月壬
午朔克袁州癸卯胡林翼帥湘軍克武昌漢陽王珍軍
還屯岳州十二月己未援江西軍克新喻遣趙煥聯等
自茶陵收江西永甯余星元等自酃收江西永新蓮花
廳劉拔元等自桂東收江西崇義上猶

七年正月廣西寇起興安靈川二月陷柳州遣永州防
軍二千二百人隸蔣益澧別募千五百人援廣西曾國
藩以父喪還湘鄉增遣王珍軍助劉長佑攻臨江四月

援貴州軍收錦屏五月劉拔元等軍收龍泉六月王珍
軍收樂安援貴州軍收永從七月湖北湘軍將劉騰鴻
攻瑞州中鰲死復瑞州蔣益澧克興安八月壬子王珍
卒於樂安十一月乙酉援廣西軍將黃輔鼎彭玉山攻
平樂中鰲死蔣益澧克平樂十二月乙卯劉長佑蕭啟
江克臨江是年援軍四出境內無警秉章以軍餉不給
始清釐漕糧浮折減納價覈官吏中飽裁監司例取省
費億計計漕折最重者湘潭恆廿五千而納一石今乃
三千八百而納一石若市價米石二千則以一千充軍
餉以八百供縣用民減賦而國用增其後湖北江西皆

仿而行焉知縣黃瀄熙方在告棄章躬造其館起之下檄令知湘鄉不由藩司文格大驚愠然無可奈何賴史直失城當議罪而更奏薦後竟補岳州知府於是文法拘格悉破矣又案揚州例推商貨貨釐設釐金局自為收支以裕餉總之藩司列銜畫行莫能問其數局庫之諸倍於藩庫秉章亦自以廉儉率下文格亦無所求取故威行於府縣貪靡之風幾革

八年正月丙午援江西軍克新淦劉長佑以疾歸三月庚辰援江西軍收宜黃崇仁四月壬子湖北湘軍將李續賓克九江乙丑援江西軍克撫州己巳克建昌蕭啟

江以疾歸五月戊子援廣西軍克柳州時江西寇悉走
浙江寇帥石大開號能合衆六年與韋昌輝謀殺楊秀
清未發秀清遣之出江西昌輝敗獨還江甯殺秀清及
其黨三萬大開聞變還昌輝並欲殺大開大開走因殺
其母妻洪秀全又殺昌輝而召大開大開不敢還遂為
流寇貪連大衆不能剽疾避官軍而行黨衆恆數十萬
故不能久屯踞援軍既進江西無寇秉章念兵合不易
當遂入浙以滅寇為期曩佑啟江先後歸恐遂不樂軍
事因奏請起復曾國藩奏下而詔至促國藩援浙兩
湖供餉秉章議以劉肅軍屬之及王珍舊部張運蘭軍

俱留在江西吳國佐者左宗棠所拔用方屯省城外為
中營六月丙辰遣從國藩發長沙八月胡林翼以母喪
還益陽戊午援江西軍將趙煥聯等與曾國荃克吉安
石寇復自福建犯江西陷瀘溪金谿安仁崇仁宜黃劉
長佑至撫州拒防九月破之新城寇還走福建長佑軍
以疾疫還十月壬戌李續賓敗死三河援貴州軍解黎
平圍進攻古州詔起復胡林翼仍為湖北巡撫曾國
藩改援安徽石寇復出江西蕭啟江至軍遣拒之贛州
吳國佐罷還以曾國荃吉安軍及張運蘭軍從國藩屯
宿松

九年正月石寇自南安陷桂陽縣蕭啟江躡之二月寇陷宜章興寧郴州桂陽州所過人馬連行六日夜湖南震恐寇將窺衡州自桂陽州取間道出花園堡陳士杰軍數百扼七孔橋殊不知其大至卒相遇遂憑橋發礮寇亦不知有軍於此愕而止未退而魏喻義將一軍本屯驛道當寇衝懼孤屯將移善地自山後建旗吹角而出寇見大驚遂返奔趣新田甯遠圍永州別陷嘉禾臨武悉徵諸軍將劉長佑江忠義田興恕余星元楊恆升李輔朝張榮組吳國佐李金暘段瑩器何紹彩王勛黃三清劉吉三赴急而令劉培元彭定太崔大光曹榮快

集潰卒蕭啟江還湖南劉坤一趙煥聯周寬世等領舊部王明山蕭翰慶陳金鰲鄒漢章自湖北來領水師黃瀉熙新領軍屯省城亦出助攻長佑至永州寇解圍走祁陽掠道州攻東安圍七日城陷知縣李右文死之犯新甯四月乙巳長佑自東安要寇新甯軍潰木山輜重盡喪收眾保新甯寇犯寶慶分圍武岡江忠義援武岡先寇五日至寇圍攻五日解去田興恕劉吉三自沅州援寶慶辛亥寇至止屯黃塘道州寇復趨新甯長佑合劉坤一江忠濬李明惠軍拒之石大開自攻祁陽防軍將王勛余星元等不能禦增遣周寬世朱品文陳湜往

祁陽趙煥聯魏喻義陳士杰防衡陽驛道屯熊羆領寇
前隊至領煥聯等退走寇不復進煥聯等還據鎮於是
寇聚圍寶慶官軍亦皆聚屯寶慶復增遣劉嶽昭楊安
臣助軍英德寇勢北趨遣蕭啟江大軍及李輔朝陳士
杰魏喻義等防郴五月陽山寇犯臨武圍藍山攻甯遠
陷永明賀縣寇敗江華營兵陷城縱掠而還胡林翼遣
李續宜將五千餘人渡湖自安化援寶慶寇大合圍并
圍田興恕趙煥聯諸軍興恕等倚城東煥聯倚城西夾
資為屯寇築壘塞其間兩軍不相聞劉長佑方從武岡
西南來不敢循驛道更繞而北余星元等屯洪橋在興

恕東有衆七千留二千人守洪橋進屯柳橋以援興恕
寇攻洪橋屯破之衆軍恒懼長佑從麻溪渡資亦西屯
李續宜自藍田來移書問進兵路黃滔熙席寶田報書
言當直而援洪橋趙煥聯知續宜欲西自圍中與書言
當自北攻續宜乃西渡浪溪當是時圍內外水陸軍四
萬悉統於續宜然湖南名宿將皆在非續宜所能統寇
連營百餘里號三十萬日食米數千石圍及兩月野無
所掠城中倚外軍悉出穀舂資興恕等軍深壕相持寇
聞新軍至欲急破之以潰諸軍反舍東而攻西六月丁
卯續宜至長佑軍中寇方先攻長佑營續宜悉軍助守

寇敗走續宜軍乘之破寇壘七以通煥聯屯官軍大歡
其夜寇吹角滿山野集衆西渡明日前隊出攻官軍其
後隊引而南走田興恕開壁出戰亦渡資合大軍城中
呼譟相慶寇既引去諸軍各相讓莫有言追截者七月
餘寇復陷東安續宜長佑分道赴援大開已踞廣西興
安續宜還湖北長佑軍疲亦罷田興恕趣靖州防黔邊
黃滔熙攻賀縣寇於江華唯蕭啟江追寇出境增調張
運蘭軍防郴永八月連州寇入宜章胡國安拒走之黃
滔熙襲江華寇於領東破走之以寇圍桂林復遣劉長
佑募新軍與蕭啟江繼進乙丑啟江至桂林長佑至全

州石寇自義甯欲合柳州土寇土寇閉城拒之遂走慶
遠趨南丹啟江還湖南長佑遂留廣西授按察使九月
張運蘭出境攻寇連州黃滔熙陳士杰等拒寇藍山皆
平之援貴州軍將兆琛周洪印等收鎮遠十二月石寇
黨奔潰四出以黃滔熙劉嶽昭屯防永桂張運蘭屯道
州

十年正月田興恕授貴州提督將二萬軍出銅仁以江
忠義募二千人屯綏靖蕭啟江自常德赴援四川四月
永州總兵樊燮以驕倨為巡撫所劾罷因構于總督指
目左宗棠布政使文格亦忌宗棠陰助燮總督疏聞召

宗棠對簿武昌秉章再疏爭之奉

嚴旨命考官錢寶

青即訊事連黃文琛王葆生等文琛固以抗直為宗棠所抑至是保明宗棠胡林翼復力解之得不逮坐文琛等微罪奪官宗棠游軍中謁林翼及曾國藩請以偏將自效國藩等慰遣之令還湖南石寇走貴州蕭啟江卒於成都雲南寇犯四川啟江部將何勝必破之井研江甯大營潰退蘇州陷授曾國藩兩江總督乃徵張運蘭軍赴祁門固徽甯保江西五月己未劉嶽昭陳品南等出境克賀縣石寇復走武緣以四川寇亟詔駱秉章往督軍而文格署巡撫時裕麟授廣東運使己一年奏

留治餉至是授湖北按察使留湖南按察使翟誥署布政使左宗棠將六千人從曾國藩赴江南前吉安知府黃冕議供支曾軍軍餉與裕麟合請國藩加推商貨釐語杜籌餉篇八月石寇還出義甯靈川恭城戊辰犯永明詔授翟誥為巡撫九月己酉受印以劉嶽昭黃瀆熙兩軍從東章行未發石寇陷綏甯殺知縣吳熊陷城步殺知縣安和攻武岡以江忠義為大將拒之城守三日寇走新甯奏留援蜀軍助攻守十月丙子寇陷東安殺知縣趙榮祺掠道州永明江華而東自藍山趨桂陽縣宜章屯將胡國安戰死寇遂仍犯南安

十一年二月庚申駱秉章軍行於道奏翟誥浮侈罷之
仍以文格署巡撫石寇後隊復自藍山走桂陽縣三月
貴州寇入靖州五月 詔文格還本官以毛鴻賓為巡
撫九月石寇部黨復犯綏甯其前杜貴州者復自來鳳
入龍山四川軍將易佩紳募兵長沙道永順馳擊之敗
績劉嶽昭軍前留湖北攻隨州間警遣援來鳳 詔以
江忠義為貴州巡撫鴻賓以西南防急奏留領軍其詞
言貴州巡撫需員云云湖南巡撫始自尊矣是秋胡林
翼薨病革時密奏劾裕麟鴻賓聞之陽奏遣裕麟赴湖
北因解其任裕麟久專利權兼攝兩司開敏無過狀官

吏民士用舍杜其指顧一旦罷去鴻賓意益得慶遠知府陸增祥憚之官從鴻賓來用黔捐例改道員以代裕麟文格以喪歸召岳常澧道憚世臨署布政使超用李逢春餅長沙縣印即知本府又專以趙煥聯居省城領防軍總營務兵餉吏治皆有私寄異於駱秉章時云十月甲戌石寇黨陷會同十一月鴻賓奏劾周鳳山募軍冗濫因頗短湘勇不可盡用欲他省命將權悉歸湖南奏入報聞石寇攻黔陽陷瀘溪劾江忠義委軍歸葬罷其貴州巡撫招改提督石寇至永明與來鳳寇合走四川

同治元年正月席寶田等軍攻來鳳寇破之復其城劉
嶽昭屯施南聞捷先上功於湖北以合擊論功布政使
惲世臨始稽鉤軍需收支計足陌錢百萬當贏萬四千
千扣水錢百萬當贏萬六千千悉拘製造工匠欲坐局
員侵牟先奏奪王加敏官覈訊無所得貴州苗教寇起
援軍出銅仁詔授田興恕欽差大臣專治貴州軍興
恕督餉湖南鴻賓怒奏停其協餉未幾興恕罷是時湖
南無寇唯月報廣西貴州邊防以為戰功西洋通商法
郎西請天主教堂故地衡州湘潭皆令官清丈還之聽
自修建於是士民引聖諭誦異端焚毀教堂兼攻從

教人法郎西公使愬之

詔官修

復衡永道黃文琛上

言事已定彼教主自建官修失體而湘潭已興工巡撫恐生事募官償修者乃罷文琛以知府張士寬攝兵備主其事以釐稅收數不符奏劾辰沅道陸傳應傳應至復漫謝之通判椿齡怨鴻賓劾罷已官因撫事愬總督且及其大喪取妾事文格時還湖南本官道武昌為解於總督湖南軍需局以三千金償椿齡寢其事十二月奏以長沙知府丁寶楨率湘將至山東討捻寇寶楨時擢陝西按察使

詔改山東

二年三月以席寶田江忠義軍出江西援安徽文格移

廣東惲世臨為布政使五月毛鴻賓遷兩廣總督世臨代為巡撫鴻賓以文格挾前事因劾罷之率湘軍將張運蘭揚安臣劉德謙以行世臨既得位當奏署布政使越次用糧儲道李明墀按察使倉景恬不能堪請病去八月石寇部黨李復猷犯永綏時大開已於四川破散被禽斬餘黨依復猷欲還廣東出酉陽窺辰沅大集諸軍防之湖南名將已盡世臨不習軍張文報而已復猷遂入會同殺知縣鄧爾昌陷綏甯分走道州陳士杰拒戰寇潰散走江華出廣西別部掠迪道敗靖州防軍十月廣東軍禽斬復猷於連州湖南以捷聞世臨本依鴻

賓以起至是鴻賓大怒世臨又追前事奏徵陸傳應自
貴州至長沙會計釐稅收數鉤考其事不能竟也稍修
小怨以飲博事羅致道府十餘人又好以訪聞案事皆
示意令自引退石贊清為布政使守例奉行吏治不能
廉物議譴譁矣然世臨謹事巨室陽示同好惡士大夫
喜事者翕然稱之

三年五月江浙逸寇犯江西大增防軍踰二萬分屯諸
府自釐貨鹽茶稅興公私饒裕冗軍益多皆坐營無戰
事比於額兵而滑情諂巧之將亦由此進咸豐以前諱
言寇入自毛鴻賓以後每奏事必言東西同警羣寇迭

至以希大舉焉六月江甯克洪寇平防軍仍屯戍備寇
四年二月憚世臨罷以李瀚章為巡撫世臨為政多倖
門高下任意又刻覈自以習例案明銓格於補官屢詰
難吏部而時議追咎毛鴻賓專擅威福皆自世臨發之
欲竝去此兩人然其牽引多重發難乃假例事付吏議
鴻賓世臨皆自以為無恐及奏上竟降調世臨出不意
湘軍將以其治軍疏又力主摧稅濟東征乃率醵銀五
萬以資其歸瀚章本起湖南州縣久從曾軍無所不諳
練特喜靜鎮抑英銳頗收權歸之官舉錯又異矣三月
洪寇餘黨汪海洋等屯踞福建廣東邊議四省合擊復

增軍遣陳士杰自桂陽出仁化王永章自宜章出樂昌張義貴屯郴州四月鮑超軍自江西援陝超假歸四川遣總兵馮標等將前軍出漢陽待餉湖北餉不時發又不令其軍至省城久屯金口軍士怨望馮標等短於撫馭超軍號霆營多收降寇不樂西征乃謀而叛直掠而南欲合福建餘寇霆營剽悍有名諸軍畏之過於大寇遂自袁吉入攸殘安仁而南湖南屯軍至眾當突而過先敗趙煥聯所部軍劉德謙要之不及委所掠東走德謙軍收趙部軍械無算叛軍至桂陽縣乃遇陳士杰拒戰大破之餘千餘人逸去八月復遣羅營彭炳武等助

二
柳防悉汰并援貴州軍為二十營以周洪印領之十二月汪海洋及叛軍皆平東南休息乃議援黔

五年以李元度為大將出沅州攻銅仁石阡寇以周洪印等出靖州攻天柱清江苗

六年夏李瀚章遷總督劉崐為巡撫奏罷洪印及貴州布政使兆琛軍以席寶田募新軍討苗始大用兵矣朝議令四川湖南俱出軍兼供其餉以平黔為期湖南鹽茶貨釐稅自海口通江浙定絀於前十之六所加東師餉稅復停因議捐輸李榕為布政使倡言當先令巨室助資以率齊民實不能行而士民怨恨摭他事令言

官劾榕所委用者而張自牧久領黔捐局故指攻自牧
劉崐奏辨悉直之其冬增遣黃潤昌率軍出晃州克鎮
遠

八年春潤昌自施秉謀取黃平中伏死軍覆言者以陰
事復劾李榕總督李鴻章雪其事而微言榕不恤名罷
之王文韶為布政使

九年秋湘潭姦民以縣丞於朱亭捕人賕贖夜集百餘
人劫之縣丞跳走傷死以變聞因譎言哥老會哥老會
者本起四川游民相結為兄弟約緩急必相助軍興而
鮑超營中多四川人相效為之湘軍亦多有初不為姦

利及寇平軍罷散歸無業者假以報復劫掠因又招誘所杜有之各不相屬又人猥褻井不能助緩急而官吏諱劫盜憚緝捕儒生喜防未然往往推之哥老以張大其勢奏報頻頻上聞 廷議以為固有之雖詔防察終以為不能絕寇起既久督撫亦不復議䟽防罪一聞哥會輒上變發兵於是巡撫以湘潭至近大發省城屯軍及旁近軍合擊軍至六千以柳萬春于高勝為將往來潭醴間莫測寇勢稍取民間衣物所至民亦恫喝之用兵數月卒無所得虛張首虜而還

十年春龍陽姦民復讎殺杜籍同知陳景滄父子益陽

姦民亦劫縣獄荊州聞之以為寇大起總督郭柏蔭以聞朝廷未得湖南奏詰問巡撫而亂民已散去言哥老會者不已因命總督李瀚章渡湖案之罷劉崐以王文韶代之奏設保甲局而還

十一年春席寶田盡平貴州苗軍事告畢四境無所防而水陸軍如故省城城守縣火擊櫟若備寇至哥老會時有聞者軍往輒散文韶亦頗知諸軍無事坐食然不能罷貨稅捐輸益厭不復效湖南蓋貧弱矣

湖南防守篇第一

曾軍篇第二

湘軍志二

軍興而養兵之利害盡著諸帥臣則稍稍召募而江忠源以楚勇顯然兵妒勇益甚所屯則私鬥戰敗固不較反陷之咸豐二年冬湖北大營患潮勇橫恣罷遣之歸乃益道掠公奸良民婦衢市所至焚殺愚民以為官兵不如寇則姦人倡偽議謀通賊及結盟拜會相挺起矣曾國藩既奉命幫辦巡撫團練是時湘鄉先立練局請主其事辭毋憂不出且自言行軍用兵不素習已而武昌陷湖南大震始至長沙與巡撫張亮基治守禦且上奏曰團練之難難於捐貲湖南行伍空虛以練兵為

要務自軍興以來二年有餘糜餉不為不多調集大兵
不為不眾而往往見賊逃潰未聞有鏖戰者所用兵器
皆大礮鳥槍遠遠轟擊未聞有短兵交鋒者其故何哉
由兵未練習無膽無藝故也今欲改弔更張於省城立
一大團擇鄉民壯健樸實者招募來省練一人收一人
之益練一月有一月之效又曰湖南會匪自粵逆入楚
大半附之而去然猶有串子紅黑邊錢香會成羣嘯聚
如東南衡永郴桂西南寶慶靖州萬山叢薄為卵育之
區有司亦深知其不可遏特不欲其禍自我而發相與
掩飾彌縫苟且一日之安積數十年應殺不殺之人而

任其橫行今鄉里無賴之民囂然而不靖彼見夫命盜首犯常消搖於法外也見夫粵匪倡獮而莫制也遂以為法律不足馮官長不足畏若非嚴刑峻法無以折其不逞之志臣欲純用重典以鋤強暴即良民有安生之日臣身雖得殘忍嚴酷之名所不敢辭今之急務杜使通省無不破之案而盡除大小各會匪則滌瑕蕩穢可期也有曾經搶掠拜會結盟者請即用巡撫令旗恭請王命立行正法內姦既清外寇雖至無能為已於是立三等之法重者斬次杖斃小鞭責釋之而已不以煩府縣獄又手書告勸鄉人士耆老雖幼賤身自下之必

與鈞禮有所布告皆通啟自名每牒府縣招致賢俊牧
令雖怙舊習然親見大人尊官與鄉民諸生為等夷亦
稍稍悟悔官民否隔頗詢地方利病山野材智之士感
其誠雖或不往見人人皆以曾公可與言事湖南欣欣
鄉治矣國藩以十二月壬辰治軍事

三年正月丙午朔丁未寇棄武昌下犯安徽江甯湖南
不受兵乃益招募教練兼令營兵防城者月六日合操
撫標中軍參將塔齊布日閱所部軍訓練有法諸州縣
亦時稟承國藩言所興除有上言胥隸貪忍輒捕治斬
之其行館即訊者經三月殺五十餘人文法吏大譁張

亮基移督湖廣未幾移撫山東署湖南巡撫潘鐸引疾去駱秉章復來以國藩所行異於羅繞典及諸團練大臣心誹之然見其所奏輒得 褒荅受 主知未有以難也二月常甯土寇起以劉長佑將楚勇五百人湘勇三百人往未至其縣團丁討定之陽山寇窺宜章大庾寇入桂東殺汎官以張榮組將七百人往衡山土寇起三月劉長佑破平之永興安仁茶陵時有寇發輒聞而兵隨至姦軌破散五月洪寇分黨圍南昌江忠源往援因乞師湖南以羅澤南將湘勇千二百六月辛卯起行道醴陵忠源弟忠淑將楚勇千壬辰起行道瀏陽署鹽

道夏廷樾將營兵六百人湘勇七百丁酉起行道醴陵
援軍之行也國藩念營將積敝不可用純用書生為營
官率皆生員文童以忠誠相期獎然未經行陳故以楚
勇百戰者偕楚勇尚剽銳營制疏略乃命千總張登科
領湘勇二十人為前哨戒忠淑登科曰哨探必百里至
瑞州待湘軍而行忠淑徃其家軍稱勁旅心笑曾公怯
驅而前中途譎言寇至譁而潰走姦民譟驚之棄軍械
餉銀退保義甯留十餘日乃進七月壬申湘軍至南昌
則戰城下書生爭奮搏寇寇陽退鈔其後軍敗營官附
生謝邦翰童生羅鎮南易良幹羅信泉戰死澤南收眾

入城於是國藩聞之以為湘勇果可用雖敗敢深入官兵不如也江忠源初至九江奏請增兵國藩與書曰今日之極可傷恨者杜兵敗不相救而已蓋調發之初徵兵一千而抽選數營或數十營卒與卒已不相習統領之將又非平日本管之官遂乖然不能以相入至於兵與勇遇尤相嫌恨桂東之役三廳兵尋殺湘勇於市江西之行鎮箠兵殺湘勇於三江口傷重者十餘人以今日營伍之習氣與調遣之成法雖聖者不能使之一心足下前奏調雲貴湖廣兵六千募勇三千合為一萬自成一軍夫六千之兵必有一二鎮將統之其勢不能相

下而將弁中又多卑庸無足與語者鄙意欲練鄉勇萬人概求吾黨質直曉軍事之君子將之以忠義之氣而輔之以訓練之勤相激相劇而後可以言戰也忠源未及用而江西楚勇以索賞復潰健銳者皆棄去江軍遂弱九月敗於田家鎮是時湘營制營三百六十人中營羅澤南將之左營王珍將之右營鄒壽璋將之塔齊布將兵勇凡二營周鳳山儲玟躬各將二營曾國葆將一營國葆仍欲充廣至六千人合忠源所將成一萬為義師而已居湖南有寇乃佐巡撫治兵故多與軍民政事長沙協副將清德自以為將官不統於文吏雖巡撫例

不問營操而塔齊布諂曾國藩壞營制提督鮑起豹者
昏庸自喜聞清德言則揚言盛夏操兵虐軍士且提督
見駐省城我不傳撫敢再妄為者軍棍從事塔齊布沮
懼不敢出司道羣官皆竊喜以謂可懲多事矣提標兵
固輕侮練勇倚提督益驕適湘勇試火槍傷營兵長夫
因發怒吹角執旗列隊攻湘勇城上軍皆踰堞出城中
驚譁國藩為輒試槍者以謝乃已俄而辰勇與永順兵
私鬥辰勇者塔齊布所教練也提標兵益傲怒復吹角
列隊討辰勇於是國藩念內鬥無已時且不治軍即吏
民益輕朝使無以治姦軌移牒提督名捕主者提督

亦怒謾曰今如命縛詣轅門標兵洶洶滿街國藩欲斬
所縛者以徇慮變猶豫未有所決營兵旣日夜游聚城
中文武官閉門不肖誰何乃昌狂公圍國藩公館門公
館者巡撫射圍也巡撫以為不與已公事國藩度營兵
不敢決入方治事力矛競入刺欽差隨丁幾傷國藩乃
叩巡撫垣門巡撫陽驚反謝遣所縛者縱諸亂兵不問
司道以下公言曾公過操切以有此變國藩客皆憤怒
以為當上聞國藩歎曰時事方亟臣子旣不能弭大亂
何敢以已事瀆君父吾甯避之耳即日移屯衡州已而
湖北事亟總督吳文鎔故國藩坐主專倚援湖南奏調

湘軍有詔令曾國藩赴援駱東章供支其軍巡撫亦
以寇棘故手書謝國藩且召之同守省城王珍時將湘
勇聞援鄂自請增募合三千人先往十月武昌寇去江
忠源擢安徽巡撫兵少不能進侍郎宋晉請發湘軍援
安徽時新募壯勇分擊土寇未嘗休息合會軍餉乏絀
器械旗服樸陋又方議水軍造戰筏守湘初無意勤遠
而鄂皖羽檄日至月三四奉詔促出師乃議遣王珍
珍既得請餉省城不復啟國藩後又罷行國藩議合併
湘勇為十營沐珍軍珍大怨望國藩初本倚珍為大將
既以軍新集技器粗脆遠出遇寇憂必敗而珍頗易言

兵度其才氣終不能為下乃聽珍別將十二月江忠源
死廬州

四年正月總督吳文鎔敗死黃州國藩知時事愈危勢
不得出十全於是改營制以五百人為一營其非湘鄉
人各領鄉軍者隨所統為小營凡陸軍五千餘人為十
三營水師五千人為十營戰船二百四十坐船二百三
十器用工匠米炭襍具及員弁丁夫水陸萬七千人建
旗東下留羅澤南屯衡州鎮土寇 文宗以國藩一人
兼統水陸軍心憂之特詔貴州提督佈克慎自黃州還
赴其水營詔總督台涌會其師時寇已圍武昌台涌方

居德安而寇黨分犯通城崇陽入湘陰趣甯鄉巡撫先遣王珍會曾軍俱下寇沿洞庭者皆退走陸路游弈自如二月庚辰遣儲玟躬拒寇甯鄉雨雪步進欲與寇爭城壬午未至縣十許里縣故無城垣寇已據治所官走免眾議止待後軍玟躬奮曰自軍興寇破城百數皆待其休息或飽掠棄去耳今舍營兵起義勇奈何聞警咨起即部分其五百人分三道鄉甯鄉寇方散掠遂乘攻之市中寇各求門出走玟躬止營郊外休士會食而躬率十餘人行衢巷撫難民寇先出者不知官軍至方還縣見街中橫尸大驚復出東門乃反遇玟躬相擠塞門

玟躬遽前搏寇寇前後刺之玟躬及十八人盡死寇不知主將死奔相告此來者以數百人敗數千眾今止營待後軍不可當也即夜引去合蒲圻寇眾俱去湖南境內解嚴省城湘潭初聞寇破甯鄉大懼及聞寇去知由玟躬一戰道路交頌儲石友云甯鄉人見其戰者尤感念即日為立祠蓋自此湘軍重赴援人人稍知榮戰死矣國藩前軍至岳州王珍先屯岳州城見寇退議進兵崇通寇大上三月寇先由蒲圻犯岳州乙巳敗王珍於羊樓丙午塔齊布復通城其日王珍退守岳州鄒壽璋屯城中謂珍曰城空無食不可守也珍不聽戊申寇至

壽璋率所部退保南津會水師而別將還保城城空軍士一日不得食王珍繼城走眾亂國藩遣礮船迎師免者千餘人潰死大半俱走保長沙寇眾乘之遂據靖港距省城六十里再犯甯鄉敗湘勇三營營官伍宏鑑戰死塔齊布自崇陽還奉檄援甯鄉會寒雨行三日未至甲子寇陷湘潭是日國藩下檄塔齊布改援湘潭使者以為軍在甯鄉行半日遇之乃杜中途距湘潭反近塔齊布亦未知湘潭已破喜於憑城保大縣以自固四月己巳朔軍長驅入湘潭將入城乃知寇先杜勢不得退寇間有官軍至亦即發兵拒戰迫相遇塔齊布不得退

則馳陷陳軍士皆出薄戰寇自起與官軍未嘗短兵接相顧愕欲退其後隊望四山多負仗者以為官軍大至則先走因相蹂官軍譟呼觀者皆譟呼遂大破之追至城乃還立營其日長沙惴惴居賊中人自以為必敗國藩集謀攻守皆曰入城坐困宜親督戰或議先靖港奪寇屯或曰靖港敗還城下死地矣宜悉兵攻湘潭不利保衡州即省城陷可再振也水師十營官皆至推彭玉麐決所鄉定鄉湘潭五營先發約明日國藩帥五營繼之夜半長沙鄉團來請師曰靖港寇屯中數百人不虞我可驅而走也團丁特欲藉旗鼓以威賊已作浮橋濟

師機不可失聞者皆踊躍國藩亦憂湘潭久踞思牽之
改令攻靖港庚午平旦至水急風利礮船徑逼寇屯寇
礮發船退不得上纜而行寇出小隊斫纜者水師遂大
亂陸軍至者合圍丁攻寇寇出團丁遽反奔官軍亦退
爭浮橋橋以門扉牀版人多橋壞死者百餘人國藩親
仗劍督退者立令旗岸上曰過旗者斬士皆繞從旗旁
過遂大奔國藩憤自投水中章壽麟負之還船日午還
至城下而湘潭大捷報至先所遣水師距湘潭十里聞
陸軍戰勝鳴角發礮直上塔齊布軍三日三勝壬申寇
散走水師盡燒所掠船寇大敗走靖港遂俱走還岳州

湘潭既復國藩以軍不精練悉汰所部留五千餘人因
留長沙造船增調羅澤南李孟羣陳輝龍將水陸軍圖
再舉上奏自劾而駱秉章及提督鮑起豹自上其功
文宗詰責提督即日奪官 詔塔齊布以副將署湖南
提督方事之急也布政使徐有壬遠室走達旦明日與
按察使會詳巡撫請罷遣曹軍語倨妄甚巡撫語有壬
且待之及克湘潭國藩猶待罪俄而得 溫詔且超用
塔齊布文武官大慙沮有壬詣國藩頓首謝城中防兵
聞代大將皆驚服以為 天子明見萬里塔齊布受提
督印則徧賞提標兵得軍功六品牌者三千人使人人

知新提督無修怨之心標兵大譴平寇功由此起五月
甲寅岳州屯寇陷常德六月己巳寇陷湖北省城時方
治水軍未能救也塔齊布屯湘陰新牆待水軍庚辰俱
進攻岳州甲申水軍渡湖丙戌焚寇舟七月戊戌朔寇
空岳州城東北屯城陵磯倚江水陸相倚角癸卯國藩
舟發長沙壬子至岳州癸丑水師三營敗績語杜水軍
篇乙卯塔齊布挑戰禽斬寇帥曾天養戊午寇攻羅澤
南營出戰大破之澤南初合軍未嘗出攻寇寇以為怯
塔齊布數激挑澤南澤南愈益閉壘至是開壁大戰遂
以勇略著聞名亞塔齊布及今並稱焉閏月戊辰朔城

陵磯寇遁走荊州將軍官文等遣軍將會水師於螺山
塔齊布羅澤南東攻崇陽己丑陸軍破寇屯於羊樓洞
八月己亥復崇陽己酉國藩進屯金口辛亥澤南等進
屯紙坊癸丑會於金口澤南請沿江東岸攻花園寇屯
至大破之塔齊布伏兵洪山要寇路水師順流燒寇舟
於鹽關漢關鮎魚套丁巳皆破之戊午燒寇舟於漢口
盡破之己未寇棄武昌漢陽遁走署總督楊需方屯德
安一日而聞捷六日捷上聞九月辛未國藩奏至京師
文宗大說詔國藩署湖北巡撫戊寅又詔國藩督
軍解署任以前已奪官加賞兵部侍郎銜且以下長

江克金陵為裒勉當是時湘軍銳甚而武漢空虛楊需度不可居又貪因人功自請合兵分三道已當北岸攻蘄廣濟塔齊布等率湘鄂陸軍趣南岸攻大冶羅澤南率湘軍攻興國所至寇破散國藩督水軍舍蘄不攻順流直進期會於田家鎮詔戒以孤軍深入南北軍强弱不相當寇將併於江北又詔江西巡撫以黃州寇必據九江湖口相蛾聚當先設防楊需陳啟邁不能奉行國藩急於破寇帥軍自進田鎮者張亮基江忠源敗地也鎮當江北諸山峻峙江南大山曰半壁三面斗絕山下富池口江水南趨繞山折而東故舟行依田鎮以

避湍三年官軍失半壁山而敗至是寇踞山作五屯引湖溝之北自田鎮至蘄四十里沿岸築城鐵索纜江自半壁山屬之田鎮以遏舟師眾號十萬十月己亥塔齊布東攻富池口羅澤南西攻半壁山方作浮橋通兩軍寇出千餘阻谿我不得橋寇以舟渡數千人列南岸山左舟中寇數千人登陸列南岸山右山上五屯盡出眾可二萬我軍懼有逃者三人李續賓馳追斬以徇澤南戒眾分四隊令曰待令而後戰先動者斬寇三進三退澤南鼓之突將斬寇大旗將二人眾奔乘之寇反走阮於山自顛死者無算北岸來寇奔舟舟亂相推排覆溺

十餘舟我軍登舟寇輒自投江操舟者股票不知有維
楫於是擲火盡燔之遂奪半壁山絕崖斷鐵纜六寇既
失山因作大筏傍岸以固鐵纜江中橫大筏三盡鉤小
船節節相牢連斷其一節明日復合用彭玉麟計分四
隊椎燒其大瑣寇遂崩潰語杜水軍篇田鎮既破蘄城
寇亦退走廣濟塔齊布等渡江辛酉寇逆戰破之復東
攻黃梅寇連敗大懼悉驍悍謀死拒分屯小池口大河
埔孔壠驛及黃梅城北相首尾每屯分四五營十一月
丙寅朔攻大河埔及城北屯皆破之復黃梅癸未寇自
孔壠來逆戰破走之於濯港己丑進攻孔壠燒其屯水

師乘勝薄九江軍城下與寇聲相聞寇併力踞湖口城
與九江相犄角我軍屢勝貪戰冒礮丸犯鋒刃以相誇
塔齊布以大將頻獨身陷陳受石傷水軍恆度寇壘間
礮丸墮倉中可埽莫有退志塔齊布既屯九江南門曰
仰攻士死傷相繼羅澤南攻湖口苦戰不能克夜夜自
戒備至不能寐聞者為之寒心 文宗尤以為憂屢
詔楊需陳啟邁飭臬司都統副將領軍者及安徽諸軍
併歸調遣湖北江西兵既不足用安徽軍亦無由會合
湘軍已深入方日謀所以勝十二月丙午水軍三營越
湖口攻姑塘寇出小舟燒其坐營遂陷鄱湖不能還湖

口寇反渡江復踞小池口周鳳山往爭敗績已未寇出小舟燒國藩坐船水師遂潰

五年正月丙寅朔己巳楊需軍退漢口於是安徽九江沿邊寇盡上分三道東陷黃梅廣濟追楊需至漢口中道自小池口沿江陷黃蘄復分黨從富池渡江西陷興國通城崇陽咸甯通山且掠江西武甯率遣數百人或千人所至脅眾至漢口者後楊需二日至黃州者後需四日故需不敢入省城走保德安湖北巡撫陶恩培故湖南按察使富閉衡州城拒程裔采又請奪曾國藩軍者也至是恃總督杜外不議守備城中兵才二千人徵

兵半途聞警皆潰去相驚以寇至湖北江西方千里旬
日騷然矣始寇之起所行無留難其踞省府脅取民財
穀而已行道掠人夫不用則遣還未嘗增眾及屢敗乃
結土寇屯城鎮頗收拔悍摯者而石大開陳玉成用事
寇乃盛於此時矣湘軍萬餘人水陸分為四李孟羣等
水師回援武昌塔齊布留攻九江羅澤南入江西國藩
收蕭捷三等水師三營屯南康澤南奔命往來復弋陽
克廣信收景德攻義甯雖戰勝攻取非東南所以安危
之大故不具載塔齊布以五千人留屯議者以為頓兵
無所用武而廷議多言不可解圍光祿卿王茂蔭奏

尤切 詔亦命留攻相持半年九江湖口兩城寇懾伏終不敢犯大營七月乙酉塔齊布薨於軍周鳳山代將十一月寇陷臨江瑞州移師去未幾而敗語杜江西篇塔齊布之為將褊用兵勇皆得其死力雖號姦猾者隸其部下勇毅恆先人每出戰部曲從者度非驍勁敵十人已上輒鞭之使還嘗獨拒追寇全軍還營而已一騎陷寇地投宿民舍老嫗涕泣上食為匿馬稻秸中明日按轡徐還軍中服其神勇老師堅城卒以憤死鳳山以資級領眾自是所部弱矣湖北三陷死三巡撫故胡林翼傾身以結士倡勇敢務權略而鄂軍興

曹軍篇第二